



ZEMALJSKI MUZEJ BOSNE I HERCEGOVINE
SARAJEVO

Broj: 140-654-3/24
Sarajevo, 9.9.2024.

BOSNA I HERCEGOVINA
FEDERACIJA BOSNE I HERCEGOVINE
VLADA
Hamdije Ćemerlića 2
71000 Sarajevo
www.fbihvlada.gov.ba

PREDMET: DOKUMENTACIJA, DOSTAVLJA SE

Poštovani,

Vežano za Vaš zahtjev za dostavljanje Finansijskog izvještaja za 2023. i prvih šest mjeseci 2024. godine s uključenim svim prihodima i rashodima (Broj 03-04-1500/2024 od 30. 08. 2024. godine), ovim putem dostavljamo tražene informacije. Obzirom da dio plata i doprinosa u iznosu 43,75 % koji se isplaćuje od strane drugog poslodavca, tj, UNSA nije moguće knjižiti kao prihod/rashod, jer se ne uplaćuje na muzejski račun, već direktno na račune uposlenika, dužni smo dostaviti i neophodna pojašnjenja.

2023

U toku 2023. godine ZMBiH je od različitih nivoa vlasti, putem javnih poziva, primio iznos od **948.741,92 KM** za potrebe redovnog održavanja objekata i zbirki, kapitalnih ulaganja u infrastrukturu, svoje naučne i stručne aktivnosti (izložbe, naučne publikacije, zajednički projekti s drugim institucijama i sl.), kao i za materijalne odnosno režijske troškove. Od navedenog iznosa za troškove plata i doprinosa izdvojeno je **466.003,00 KM** (FMON, dio MKS KS, dio FMKS). Putem ugovora sa UNSA u toku 2023. je na ime plata i doprinosa uposlenicima isplaćeno oko **601.000,00 KM**.

S obzirom da su ukupni godišnji troškovi za plate i doprinose uposlenih u ZMBiH u 2023. g. iznosili **1.295.711,71 KM**, a da smo putem Ugovora sa UNSA za 2023. g. dobili **oko 601.000,00 KM** (bruto, procjena na temelju platnih listi), razliku sredstava koja su nedostajala za isplatu navedenih troškova plata i doprinosa u iznosu od **228.708,71 KM** ZMBiH je isplatio iz vlastitih prihoda za tu godinu. U toj godini (2023.), od pružanja različitih usluga, prodaje ulaznica, publikacija, iznajmljivanja prostora i sl., Muzej je ostvario vlastiti prihod u iznosu od **425.643,80 KM**, te je ostatak sredstava prenesen za rad u 2024. godini.

Adresa: Zmaja od Bosne 3, 71000 Sarajevo; Bosna i Hercegovina;

ID: 4200395820005

+387 33 668-027; tel/fax: +387 33 262 710;

e-mail: kontakt@zemaljskimuzej.ba ; web site: www.zemaljskimuzej.ba

Transakcijski račun: 1610000004990079 kod: Raiffeisen Bank dd Bosna i Hercegovina, Sarajevo

2024

U prvih šest mjeseci tekuće 2024. godine ZMBiH je od različitih nivoa vlasti, putem javnih poziva, primio iznos od **881.781,01 KM** za potrebe redovnog održavanja objekata i zbirki, kapitalnih ulaganja u infrastrukturu, svoje naučne i stručne aktivnosti (izložbe, naučne publikacije, zajednički projekti s drugim institucijama i sl.), kao i za materijalne odnosno režijske troškove. Od navedenog iznosa za troškove plata i doprinosa izdvojeno je **172.000,00 KM** (MKS KS). Putem ugovora sa UNSA za prvih šest mjeseci 2024. g. ZMBiH je dobio oko **301.000,00 KM** (bruto, procjena na temelju platnih listi).

Obzirom da troškovi bruto plata i doprinosa za 2024. g. iznose skoro 1.400.000,00 KM, tj. 678.342,00 KM za prvih šest mjeseci, iz navedenog je jasno da je nakon primanja sredstava od strane Ministarstva kulture i sporta KS i UNSA ($172.000,00 + 301.000,00 = 473.000,00$ KM), napravljena negativna razlika od oko **205.342,00 KM**, koje je Muzej, ponovo, namirio iz vlastitih prihoda.

Projekcija troškova za drugu polovinu 2024. g., govori da je za isplatu plata i doprinosa potrebno osigurati skoro 700.000,00 KM, od čega bi cca. 348.500,00 KM trebalo biti pokriveno Ugovorom s UNSA (procjena na temelju stavke iz budžeta KS). S obzirom da Federalno ministarstvo kulture i sporta, kao i Federalno ministarstvo obrazovanja i nauke, jednako kao i Ministarstvo civilnih poslova BiH, više ne dozvoljavaju isplatu troškova plata i doprinosa, iz navedenog proizilazi da ZMBiH do kraja tekuće godine treba iz vlastitih sredstava osigurati dodatnih oko **351.500,00 KM**.

U pojednostavljenoj računici, pored sredstava osiguranih putem Ugovora s UNSA (43,75 %), Muzej je svaki mjesec prinuđen osigurati ostatak od 56,25 %, odnosno, dodatnih cca 62.000,00 KM tj. cca. 744.000,00 KM, na godišnjem nivou. U 2024. g. taj iznos je umanjnjen za 172.000,00 KM koje smo dobili od Ministarstva kulture i sporta KS, te iznos sredstava koje trebamo osigurati iznosi cca. 572.000,00 KM. Kako su vlastiti prihodi u prvih šest mjeseci 2024. godine su iznosili 227.490,53 KM, navedeno ne smatramo realnim.

Također napominjemo da smo od Ministarstva nauke i obrazovanja KS, u 2024., isto kao i u prethodnim godinama, za troškove plata i doprinosa, primili ukupno 0,00 KM.

Vrlo je važno istaknuti da putem Ugovora sa Univerzitetom Sarajevo, Zemaljski muzej Bosne i Hercegovine prima **43,75 %** troškova za isplatu plata, doprinosa, toplog obroka i funkcionalnih dodataka, dijela svojih uposlenih (dio uposlenih, njih 10, nema potpisan ugovor o radu s UNSA, te troškovi njihovih plata i doprinosa idu isključivo na teret ZMBiH). Iz istog izvora i putem istog ugovora na navedeni procent se dodaje paušalni iznos za materijalne troškove Muzeja, koji je u 2023. g iznosio 118.845,60 KM a u prvih šest mjeseci 2024. g. 86.506,01 KM.

Iz svega navedenog je jasno da su vrlo nekorektni, i potpuno netačni navodi i medijski narativ pojedinih ministara iz različitih nivoa vlasti da je Zemaljski muzej BiH, u potpunosti „riješn“ putem ugovora s UNSA. Situacija je dodatno pogoršana donošenjem famoznog Zakona o privremenom sufinansiranju institucija kulture i obrazovanja čiji je osnivač BiH (tzv. Lex Specialis) u kojem eksplicitno stoji da je Zemaljski muzej BiH „sufinansiran putem Rektorata UNSA“, a u isto vrijeme, i na istom mjestu, ne stoji da se zapravo radi o 43,75 % troškova, navedenih u tom Ugovoru. Ovim putem naglašavamo da 43,75 nije jednako 100,00 %. Navedeni zakon stoga služi kao izgovor da se ZMBiH umanje sredstva od strane drugih nivoa vlasti, što se uspješno i provodi u praksi protekle dvije godine.

Iz svega navedenog, također, bi svakom racionalnom i(li) dobronamjernom, trebalo biti jasno da kadrovski desetkovana (Muzej trenutno ima 50% manje uposlenih od broja predviđenog sistematizacijom), pravno nezaštićena (bez osnivača, bez Upravnog odbora, bez Nadzornog odbora, bez legalnog direktora), Uprava Zemaljskog muzeja BiH veći dio svog radnog vremena tokom godine troši na popunjavanje sve komplikovanijih i namjerno nejasnih aplikacija za provođenje javnih poziva i grantova, sprovođenje različitih procedura i pravdanje svakako nedostatnih sredstava koje povremeno i bez ikakvog plana dobija od različitih nivoa vlasti. Ostatak vremena i energije se troši na iznalaženje načina da se pokriju troškovi plata uposlenih,

Adresa: Zmaja od Bosne 3, 71000 Sarajevo; Bosna i Hercegovina;

ID: 4200395820005

+387 33 668-027; tel/fax: +387 33 262 710;

e-mail: kontakt@zemaljskimuzej.ba ;web site: www.zemaljskimuzej.ba

Transakcijski račun: 1610000004990079 kod: Raiffeisen Bank dd Bosna i Hercegovina, Sarajevo

kroz komercijalne i(li) strateške projekte s inostranim partnerima, a u kojim u pravilu nema mjesta za finansiranje osnovnih potreba institucije, jer se podrazumijeva da je to zadatak nekog nivoa vlasti.

Iako potpuno svjesni da to nikoga ne zanima, koristimo ovu priliku da, u najsazetijim crtama, podsjetimo:

- Da od 2011. do 2015. ZMBiH nije imao nikakvo finansiranje,
- da je u navedenom periodu napravljen dug prema uposlenicima i Poreznoj upravi FBiH od blizu 4.000.000,00 KM,
- da je cijeli dug prema uposlenicima kao i prema Poreznoj upravi FBiH u potpunosti izmiren 2019. g.,
- da su se uposlenici ZMBiH odrekli kamata (oko 400.000,00 KM) na neisplaćena potraživanja od 2011. do 2015., a koja su im dodijeljena odlukom suda pred kojim se vodio spor, kako bi institucija mogla nastaviti funkcionirati,
- da u periodu pandemije korona virusa ZMBiH, kada je kao i svi ostali bio prinudno zatvoren, nije primao nikakvu pomoć od nadležnih institucija, jer „nikome ne pripada“,
- da je uz pomoć stranih donatora i partnera (Ambasade SAD, Švedske, Švicarske – Fondacija Aliph, Francuske, Italije, Irske, Češke, UNESCO i dr., u ukupnom iznosu od oko 2,5 miliona USD) te vlastitim sredstvima, uz gotovo apsolutni izostanak pomoći iz BiH, u istom periodu obnovljen:
- istočni paviljon Odjeljenja za arheologiju (krov, unutrašnje zidne površine s slikarstvom, elektro instalacije, stolarija, glavni depoi Odsjeka za prahistoriju i antiku, nabavljene pokretne profesionalne vitrine za čuvanje muzejske građe),
- da je većim dijelom sanirana originalna betonska ograda između svih muzejskih paviljona,
- da je u istom prostoru postavljena i otvorena stalna izložba Bosna i Hercegovina u prethistorijsko doba, s potpuno novim vitrinama i rasvjetom, najveća i najvažnija te vrste na području bivše Jugoslavije,
- da je u potpunosti obnovljena i klimatizirana zgrada Odjeljenja za etnologiju (elektroinstalacije, stolarija, svi izložbeni prostori, sva rasvjeta, svi depoi, nabavljene pokretne profesionalne vitrine za čuvanje muzejske građe),
- da je djelomično obnovljena zgrada Odjeljenja za prirodne nauke (sva stolarija, dio krova, veći dio izložbi i manji broj kancelarija, hodnika, svjetlarnika, te najvećih depoa, nabavljene pokretne profesionalne vitrine za čuvanje muzejske građe),
- da je ZMBiH od strane Vlade Japana odobren projekat za nabavku opreme i pomoć za digitaliziranje građe u vrijednosti od oko 1.000.000,00 USD, ali da već sedamnaest /17/ mjeseci nijedno ministarstvo ne želi da potpiše saglasnost za dodjelu navedenih sredstava, pošto „Muzej ne pripada nikome“,
- da je u potpunosti renovirana prostorija u kojoj se čuva Sarajevska hagada,
- da je nabavljen poseban sef-vitрина s najvećim muzeološkim standardima za prezentaciju i zaštitu od vatre te najviših protiv-provalnih svojstava za zaštitu iste,
- da je izvršena klimatizacija istog prostora,
- da je po prvi put u historiji Muzeja originalna Sarajevska hagada dostupna svim posjetiocima, u određenim terminima,
- da je u potpunosti obnovljen centralni Botanički vrt (zelene površine, hodne površine, ivičnjaci, ograda, stepeništa, rasvjeta, ugrađen sistem za prikupljanje oborinskih voda, 2x 5000 l, s pumpama za izbacivanje tj. korištenje vode za zalijevanje vrta), te da je za taj projekat vrijedan blizu 600.000,00 KM od strane zaista nadležnog Federalnog ministarstva kulture i sporta, zaduženog za održavanje nacionalnih spomenika BiH, Muzej dobio rekordnih 4.000,00 KM, koje su uspješno opravdane istom,
- da je izrađen plan obnove i da je pristupljeno izvršenju radova na prostoru južnog dijela Botaničkog vrta koji je zapušten zadnjih 60-tak godina,

Adresa: Zmaja od Bosne 3, 71000 Sarajevo; Bosna i Hercegovina;

ID: 4200395820005

+387 33 668-027; tel/fax: +387 33 262 710;

e-mail: kontakt@zemaljskimuzej.ba ;web site: www.zemaljskimuzej.ba

Transakcijski račun: 1610000004990079 kod: Raiffeisen Bank dd Bosna i Hercegovina, Sarajevo

- da su svi navedeni zahvati na infrastrukturi izvedeni uz provođenje javnih nabavki (tendera) po zakonskim procedurama, te sprovedeni od strane kompanija certificiranih za izvođenje radova na nacionalnim spomenicima Bosne i Hercegovine,
- da su obnovljeni toaleti za posjetu u zgradama Odjeljenja za arheologiju i Odjeljenja za prirodne nauke,
- da je uspostavljena saradnja s institucijama kao što su Smithsonian Institute i Muzej Louvre, kao i mnogim relevantnim srodnim institucijama iz BiH i bližeg i daljnjeg okruženja,
- da je nastavljeno publikovanje najstarijeg naučnog časopisa u BiH, Glasnika Zemaljskog muzeja Bosne i Hercegovine (prvi broj izašao: 1889. g.), te drugih stručnih i naučnih publikacija,
- da ZMBiH od 2018. g. ima fiskalnu kasu i kartično poslovanje,
- da je ZMBiH izradio plan nabavke službenog mobilnog telefona i službenog vozila u periodu 2025.-2028.,
- da je prema uputama naših stručnjaka i prema bazi podataka i predmeta iz zbirki Odjeljenja za etnologiju, napravljen crveni tepih koji se postavlja ispred Narodnog pozorišta tokom trajanja SFF-a,
- kao i mnogo toga drugog, što se nalazi u našim godišnjim izvještajima, koje nemamo kome dostaviti „jer Muzej ne pripada nikome“.

Na kraju, uz zahvalnost što se interesujete za poslovanje Zemaljskog muzeja Bosne i Hercegovine, kao i uz izvinjenje zbog ovog pretjerano dugog dopisa, napominjemo da umjesto 108, Muzej trenutno ima 55 uposlenih, da se u našim zbirkama raspoređenim u 4 objekta iz 1913. g., nalazi oko 3.000.000 predmeta, uključujući biblioteku sa preko 300.000 naslova. Mali procent istih predstavljen je putem 20-tak izložbi koje su uvijek na raspolaganju posjetiteljima. Tokom 2023. g. ZMBiH je prodao 48.962 ulaznica, a ukupno ga, računajući one koji u njega redovno ulaze besplatno (predškolski uzrast, svi posjetitelji tokom dana otvorenih vrata, rođendana Muzeja, kao i redovnih besplatnih termina i sl.), godišnje posjeti blizu 100.000 posjetilaca. U prvih 6 mjeseci prodano je 25.925 ulaznica, što govori da će u konačnici cifra posjetitelja biti veća nego prošle godine. Ali, nema veze, jer Muzej ionako ne pripada nikome.

v.d.direktora ZMBiH

Mirsad Sijarić



Adresa: Zmaja od Bosne 3, 71000 Sarajevo; Bosna i Hercegovina;

ID: 4200395820005

+387 33 668-027; tel/fax: +387 33 262 710;

e-mail: kontakt@zemaljskimuzej.ba ; web site: www.zemaljskimuzej.ba

Transakcijski račun: 161000004990079 kod: Raiffeisen Bank dd Bosna i Hercegovina, Sarajevo